

REGIONAL NEWS

HEADLINES:-

1. Chief Minister Pu Lalduhoma'n Zirna lamah kohhran nena innghenga kal an duh tih sawiin PPP mode a kal dan tur an dap mek a ti.
2. World Environment Day pualin vawiin khan Mizoram hmun hrang hrangah hun hman a ni.
3. Lok Sabha inthlan 2024 result puan anih hnuah ramchhunga Political Party-te sawrkar siam turin an inbuatsaih chho mek.
4. Prime Minister Narendra Modia chuan vawiin khan President Draupadi Murmu-i hnenah Prime Minister anihna atanga banna a thehlut.

<><><>

MLAs & SYNOD

Chief Minister Pu Lalduhoma'n Zirna lamah kohhran nena innghenga kal an duh tih sawiin Public Private Partnership PPP mode a kal dan tur an dap mek a ti.

Pu Lalduhoma hian vawiina Mizoram Synod buatsaih Synod Executive Committee (SEC) member leh 9th Mizoram Legislative Assembly Member te inkawmna J.M Lloyd Hall, Synod office-a buatsaih ah he thu hi sawiin, an sawrkar chuan kohhran leh tlawmngaipawlte nena thawhhona tha tak neih an duh tih sawiin Duhsak bik nei lova kala mipui sawrkar neih neih an tum a ti a, Eirukna leh hlemhletna titem turin Project Monitoring Committee chak takin an kal mek tih sawiin endik tur a tam avangin hun reilote chungin an endik vek seng dawn lo a ti a, Ram leilung semrual thua Progressive Tax system hmanga ven theih a nih an beisei a, ram pum hi LSC hmanga cover vek a tha tih sawiin a thawktu indaih lohna chu pawh lam mi chhawr an tum dawn tih a sawi.

Chief Minister chuan Zu leh ruihhlo do thu ah kohhran hrang hrang thalaite nen an sawiho tawh a, Core Committee din tharin a kal dan an tidanglam a, cheng nuai 3 hmanga bultan an tum mek a, hnathawh tichak turin Dan siamrem an tum tih a sawi.

Assembly Speaker Pu Lalbiakzama pawhin thusawiin, Mizoram Synod-in remruatna fel tak neia inkawmna a buatsaih chu lawmawm a tih thu a sawi a. Sawrkar leh ram hmangaihtu kohhran an nei chu vannei takzet a ti bawk.

Mizoram Synod Secy Rev. P.B Mankima chuan ram rorelna chu Pathian rawngbawlna pawimawh a nih avangin thawhpui an inpeih reng a ti a, Mizoram Synod chuan Mizoram Sawrkar chu Hleih nei lova rorel turin leh eirukna tibo turin an duh a ti a, Dan hmanga rorelna kengkawh turin leh Chanchintha leh sakhaw venhim te leh zirna siam tha tura thawhho bakah Ram hmasawna tura tan la turin an duh a ti a, Ram leilung insemrual tura tan la turin leh Zu leh ruihhlo tirem tura tan laa Sumdawna tha lo tibo tura hma la in Fa nei tam tura hma la turin an duh a ti a, Hriselna kawnga nasa lehzuala tan la turin leh Thing leh mau leh nungchate humhalh leh Mizo tawng humhalh tura tanlak bakah 8th Schedule-a telhtir tura hma la turin an duh a ti a, Ramri chin siam fela humhalh leh State dang nena inkalpawhna tha neih bakah Thutiama rinawm turin leh tihhlawhtlin theih loh tur thila mipuite hmaa intiamna nei lo turin Mizoram sawrkar an ngen a ti bawk.

AMC CANDIDATES

Aizawl Municipal Corporation (AMC) Ward 19-na Corporator tur thlanna tun thla ni 25-a neih tur chuh turin party pathumin hming an pe lut tawh.

Vawiin khan MPCC President Pu Lal Thanzara chuan an candidate atan Effie Vanlalmangaihi an ruat tih a puang a, Effie Vanlalmangaihi hi MA (History) niin Venghnuai Local Council member atan tum hnih thlan alo ni tawh a, Congress Mahilla ah secretary hna a chelh mek a ni.

MNF party Nomination Committee chuan Dr. Lalrinzuali Hrahse, Aizawl Kulikawn veng chu an ruat a, ZPM chuan AMC Ward 19-na inthlan chuh tur hian an party candidate atan Dr. C. Malsawmtluangi, Hlimen veng an ruat tih an lo puang tawh a. BJP pawhin an candidate tur naktukah puan an tum tih kan Corr. an hrilh a ni.

He inthlanah hian chuh tum te tan Municipal Returning Officer (Addl. DC Office, Aizawl)-ah chawhma dar 11 leh chawhnu dar 3 inkarah Nomination Paper thehluh theih a ni a. Nomination form pawh he office atanga vek hian lakchhuah theih a ni a. Nomination paper te hi June ni 7-ah endik a ni ang a, inhnukdawk duh tan June ni 10 chawhnu dar 1 thleng hun hawn a ni.

Aizawl Municipal Corporation Ward 19-ah hian Tlangnuam, Tlangnuam Vengthar, Kulikawn, Saikhamakawn, Melthum leh Hlimen te an awm.

<><><>

WORLD ENVIRONMENT DAY

Khawvela sik leh sa danglam zelin harsatna a thlen nasat avanga environment humhalh tura tan lak tharna ni, World Environment Day pualin vawiin khan Mizoram hmun hrang hrangah hun hman a ni.

Environment Forests and Climate Change Department Directorate ah chuan Principal Chief Conservation of Forests PCCF Pu AK Biswal kaihhruaiin hun hman a ni a, hetah hian Forest Department a thawk te chuan leilung humhim tura intiamin faina kawnga nasa lehzuala tan la turin an intiam a ni.

He ni pual hian EF&CC buatsaihin St Paul's Hr Sec ah PCCF leh Aizawl DFO kaihhruaiin mipui zirtirna hun hman a ni a. Ramngaw humhalh tura thutiam lak niin SEL Foundation Award lawmman sem a ni bawk.

World Environment Day pual hian Mizoram Pollution Control Board chuan Chanmari YMA Hall-ah hun an hmang a, MPCB Chairman Pu Liankima Lailung chuan hman puiin leilung uluk lehzuala enkawl a ngai tih sawiin tui leh boruak thianghlim tam zawk a awm theih nan ngaihtuahna thar pu-in bultan a pawimawh tih a sawi.

The Institution of Engineers (India), Mizoram State Centre huaihawtin vawiin khan World Environment Day pual hian PWD E-in-C Conference Hall ah hun hman a ni a, PWD Engineer in Chief Lalrinkima Hnamte chuan Hmasawna hnathawh kal zelin khawvela sik leh sa nasa takin a nghawng a ti a, Mizoram ngeiah pawh hmasawna hnathawh avangin harsatna leh chhianate a thleng thin a, ramngaw tichhe tam lo zawnga hmalakna kalpui a pawimawh hle tih a sawi.

MZU Asst Professor Dr. Lalsangzela Sailo chuan Sik leh sa inthlak danglam nasat avangin khawlum mai nilo kangmei chhuak a tam a ti a, vawi leh khata ruahpui sur vakte a thleng a, ruahpui tlak dan pawh a danglam nasa hle tih sawiin Mizorama kuthnathawktute pawhin an tuar mek tih a sawi.

District dangah pawh hun hman niin Champhai ah chuan Champhai Vengsang Biak In bul atanga Bethel veng Circuit House thleng Champhai khawpui chhunga Eco-Club nei school naupangten kawng an zawh a. Thuziak kengin ramngaw humhalh pawimawhzia inzirtirna neih a ni.

Saitual District chuan environment chungchanga awareness Campaign Saitual High School II leh District Higher Secondary School Keifangah neih a ni a, ramngaw leh nungcha humhalh lam hawi zawnga inzirtirna hun hman a ni bawk. Khawvela sik leh sa danglam zelin harsatna a thlen nasat avangin United Nations chuan kum 1973 atang khan kumtin June ni 5 hi 'World Environment Day ' atan a puang a. Kumin he ni thupui atan 'Land Restoration, Desertification and Drought Resilience' tih chu thlan a ni.

<><><>

SPORTS MINISTER

Sports & Youth Services Minister Pu Lalnginglova Hmar chuan vawiin khan Department hotute leh Sports Authority of India(SAI), NERC, Imphal te kawmin infiamna lama hmasawna tur hrang hrang an sawi ho.

Naupang zawk te talent haichhuah nana Programme pakhat Khelo India Rising Talent Identification Programme, Rajiv Gandhi Stadium, Mualpui-a neih mek chungchang pawh sawi niin he intihsiakna hi June Ni 7 (Zirtawpni) thleng a awch dawn a, a tum ber chu Sports lama tui leh theihna nei naupang te talent haichhuahsaka; grassroot level atangin practices mumal tak neihpuia, hma an sawn zel theih nana kaihruiin, technical support pek leh tunlai thiamna hmanga an talent tihpun a, nakin zela Mizoram tan mai ni lova International Sports Event hrang hranga India ram aiawh thei tura Infiammi te buatsaih a ni.

Olympic 2036 lo awm tura Mizorama naupang infiammi te tel ve phak turin Mizoram a naupang infiammi ten talent an neih that thu sawiin, hemi a hlawhtlin ngei theih nan Sports & Youth Services Department leh SAI, NERC, Imphal te chuan thawhona tha zawk neiha, a tul anga hmalak nise tiin inremna neih a ni bawk.

<><><>

CHAWNGTE STUDENT PROTEST

Chawngte-ah Kamalanagar Higher Secondary School-a zirtirtu dah belh phutin vawiin khan zirlaite sikul kawtah an pungkawm a, Education leh Economics-ah zirtirtu an duh belh tih lantirna thuziakte an ken bakah, Zirtirtu an duh thu an aupui a ni.

Chawngte Mizo Students' Union Hq chuan Kamalanagar Higher Secondary School-ah hian thawktu an indaih lo thu leh Education leh Economics lecturer an awm loh thu Mizoram Sorkarah thlenin an thil thlente tihlawhtlin a nih loh chuan school kai tur dan an tum thu thuchhuah a siam tawh a, Education Minister hnen atangin chhanna an dawn hnuah nimin khan school kai tur dan an tum pawh an in hnukdaw a, Chuti chung chuan tukin khan zirlai Uniform ha eng emaw zatin school kai tur dangin school kawtah an pungkawm a, MSU hruaituten Mizoram sawrkar nena an in dawr tawn dan hrilhfiahin, June thla chhung ngeiin thawktu indaih lohna chu siamthat tumna leh Lecturer pawh dah

ngei tura Minister in a tiam avangin zirlai te chu inbengdaia tha taka school kai turin MSU hruaitute hian an hriattir a, June thla ral hmaa Lecturer dah a nih loh chuan chak taka hmalak a nih tur thu an sawi hnuah boruak duhawmlo engmah thleng lovin school an kai chhonzawm a ni.

Govt. Kamalanagar Higher Secondary School ah hian thawktu an in daihlo hle a, Lecturer 14 awm tura ngaih anih laiin tun dinhmunah Lecturer 5 chauh an awm a, nikum September thla atang khan Economics leh Education Lecturer nei lovin zirlai ten an duhzawng subject pawh an thlang hleithei tawh lo a ni.

<><><>

HORTI MINISTER

Horticulture Minister Prof. Lalnilawma'n Aizawl Zo Anthurium Growers Cooperative Society Ltd.) Collection Centre a tlawhna ah ZAGCS hruaituten Anthurium festival neih zel theih nise tia rawtna an thlen chu chhangin hemi thu ah hian hmalak mek a ni a ti.

Minister in Ramhlun North ami Collection Centre a tlawhna ah hian Horticulture Department in ZAGCS te Anthurium hlawhtling taka chin leh zawrhchhuah a nih theihna tura hma an lakpuina chu lawmawm a tih thu sawiin, an thawhchhuah tur sawngbawlina hmun a tak ngeia a hmuh atangaa ZAGCS ten hma an lak nasat zia leh Anthurium hmanga Mizoram an tih hming thatna ah lawmawm a tih thu sawiin ZAGCS harsatna tawh mek chu hma a lakpui dawn a ti a, Anthurium chu Mizo te'n a tourism lama hma an sawnna pawimawh tak a nih avangin Anthurium festival neih zel theih nise tia ZAGS hruaitute rawtna thlen chu hmalak mek ani tih a sawi.

He hunah hian Anthurium chu Mizoram tual to nilo mahse, Mizoram a thar quality chu a that bik avang leh Mizoram atanga kartin thawhchhuah awm chhun a nih avang hian hei aia zau zawk leh uar lehzuala hmalakna tlak a nih thu te sawiho a ni.

ZAGCS hi kum 2016 ah din niin tunah hian member 150 Aizawl, Lunglei, Serchhip leh Kolasib ah an awm mek a, kartin cheng sing 4 man bawr vel Delhi, Phul Mandi ah an thawh chhuah anih bakah tualchungah tam tham tak hralh chhuah a ni bawk.

<><><>

PM

Lok Sabha inthlan 2024 result puan anih hnuah ramchhunga Political Party-te sawrkar siam turin an inbuatsaih chho mek.

Puan tawh angin BJP kaihhruai NDA chuan seat 292 ah chakna changin BJP-in party malin seat 240 ah hnehna an chang a. An thawhpui Telegu Desam Party in seat 16 leh JD (U) in seat 12 an la ve bawk.

INDIA bloc in seat 233 an la a. Congress in seat 99, Samajwadi party in seat 37, Trinamool Congress in seat 29, DMK in seat 22 an la ve bawk a.

NDA leh INDIA bloc a tello midangin seat 18 an la a ni.

Vawiin khan Union Cabinet thutkhawm chu Prime Minister Narendra Modia-achenna inah neih niin a zawna term thumna atan Prime Minister Modi-a kaihhruaina hnuai sawrkar siamchhoh dan tur an ngaihtuah a.

NDA memberte hi vawiin tlai khan Delhi-a Prime Minister Narednra Modia chenna inah an inhmukhawm nghal a, TDP hruaitu Chandrababu Naidu chuan Delhi a pan hmaa chanchinbumite a kawmnaah mipuiten an thlang tling chu lawmthu a sawi a. NDA chuan Andhra Pradesh tan hausakna tam tak a thlen ang a ti.

JD(U) hruaitu Nitish Kumar leh Lok Jan Shakti Party (Ram Vilas) hruaitu Chirag Paswan te pawh NDA inhmukhawmah hian an tel a ni.

Vawiin tlai vek khan INDIA bloc member te hi Delhi ah an inhmukhawm baw a. He hunah hian Congress President Mallikarjun Kharge chuan inthlan result leh an hmalak zel dan tur an rel dawn a ni a ti.

<><><>

PM

Prime Minister Narendra Modia chuan vawiin khan President Draupadi Murmu-i hnenah Prime Minister anihna atanga banna a thehlut. Rashtrapati Bhavan-a Prime Minister Modia'n banna a thehluh rual hian Union Council of Minister-te banna a thehlut tel a. President Draupadi chuan banna lehkha chu lo pawmsakin sawrkar thar siam anih hma chu Prime Minister hna lo chelh lailaw turin Pu Narendra Modia chu a ngen a ni.

Prime Minister Modi hian vawiin vek khan Vice President Jagdeep Dhankar pawh a hmu nghal a ni.

<><><>